

UNIFORM DI SCHOOL TA ESENCIAL PA JOVENNAN AWEN DIA

Diabierna atardi den caya grandi por haya cantidad di mucha despues di school.

Ayera mes por a mira un grupo di mucha ta haci "nan paranda di caya" pasobra no tabata tin school aparentemente.

E ora ey bo ta cuminza pensa y puntra bo mes: "Ta di cual school e muchanan aki por ta?"

Pa por sa esey, e muchanan mester di uniform.

Uniform no pa wordo distingui riba caya, pero uniform pa distingui nan di e diferente schoolnan, y cu ta yuda mayornan alavez, y tambe pa otro factornan.

Algun aña pasa tabata tin persona cu a bini cu idea pa uniformnan cu lo a wordo traha den exterior na cierto pais y cu lo a sali mayornan barata.

E no por a sigui pasobra interes di otronan a bin hunga un rol den esaki. Otronan tambe a cuminza move den e direccion aki y awe ta poco school tin uniform.

Si muchanan di school tin uniform di school, ta hopi placa esaki por scapa mayornan.

Nan ta scapa sigur placa di carson (Jeans), blusa, polo shirt y camisa. Na lugar cu e muchanan ta bisti un carson di cas (di marca y caro) pa school tur dia, e muchanan por bisti cierto jeans cu ta sali mas barata. Na lugar cu e muchanan ta bisti cierto blusa of polo-shirt di cas (di marca y caro) nan ta bisti e blusa of polo cu ta sali e mayornan mas barata.

Cu e muchanan bisti mescos, tanto mucha muher como mucha hombernan, ta kita tambe e comparacion di "esnan cu por y esnan cu no por".

Esta kende tin placa pa compra cierto pañanan y kendenan no tin y no por compra cierto pañanan.

Esaki ta evita tambe un dolor di cabez pa e mayornan cu ta haya presion di nan yiunan cu ta cierto carson, blusa of polo **NAN MESTER** bisti sino nan no ta conta entre e otronan.

Uniform di school ta trece cune tambe cierto orguyo cerca esnan cu tin uniform bisti.

Nan ta haya mas respet pa nan school y pa nan mes.

Nan ta sinti mas orguyo pa nan school y pa nan mes.

Nan ta evita di dañi number di nan school y nan mes imagen.

Den caya grandi nan ta evita di haya nan mes den problema pasobra tur hende por sa mes ora di cual school nan ta bini y nan lo no kier mancha number di nan school tampoco.

PAÑANAN PA SCHOOL- PA SALI- PA FIESTA Y PA ENTIERO

Kico awendia ta paña pa school, paña pa sali, paña pa fiesta y hasta paña pa ora di entierro cerca nos jovennan.

Ripara bon cu no tin diferencia mas.

E kedsnan cu jovennan kier bisti pa school ta esnan di marca cu ta costa hopi placa (pa no menciona suma).

E carsonnan cu nan ta bisti pa hopi di nan mester ta jeans di marca y mescos ta conta pa blusa y polo.

Ora cu nan ta bisti pa sali, y ora cu tin un fiesta, ta e mes pañanan aki

nan kier bisti tambe.

Despues di algun laba, "nan no por" bisti e pañanan aki mas tampoco pasobra "nan color a bay".

Nan mester di paña nobo atrobe cu ta pa school, sali, y fiesta na mes momento. Amigonan y amiganan no por mira nan cu paña cu a perde color despues di tanto laba.

Pakico a menciona entiero anto?

A menciona entiero pasobra si mira entieronan di awendia, ta jeans jovennan kier bisti y cu polo.

Nan no conoce bistimento netchi mas, - e netchi awe ta jeans cu polo y cu keds di marca na pia.

E situacion aki a bira cu ta hopi mayor ta haya nan mes den gastonan grandi (hopi di nan pa luna) pasobra continuamente mester di paña nobo pa yiu(nan).

Jeans cu e jovennan kier compra awe ta di 70 florin of mas. Ta algun lugar tin ainda 2 pa 100 florin.

Jeans mas barata nan no kier bisti mas.

Polo di 30 florin ta mucho barata. E polonan cu nan kier awendia ta di 60 pa 80 florin (si no ta mas caro).

Keds cu nan kier no ta di 50 pa 100 florin. "Esey ta cos barata cu no ta sirbi", bo ta tende.

Nan mester di keds di 150, 180, 200 of mas florin. "Eseynan ta keds!"

Pero cos no ta caba eynan tampoco, pasobra locual ta masha "in" cerca juventud ta tambe "colonia" y "perfume".

Nan no kier "cos barata" di bao di 50 florin. Ta di 70 of mas florin nan kier, pasobra "eseynan ta hole dushi".

Pa desodorante mes tin nan marcanan tambe. Nan ta dicidi ki marca nan kier y "no bin cu kico cu ta barata".

Nan kizas no ta mira e dolor cu papa of mama tin pa por logra tur esaki pa nan, y cuanto sacrificio mama y tata ta haci pa por complacé nan.

Cu uniform pa school, mayornan lo por spaar hopi placa pa por sali for di e gastonan aki, y e jovennan mester por compronde cu nan mayornan no por sigui gasta y gasta pa nan djies pasobra otronan si por.

Pesey tambe ta bon pa schoolnan mes cuminza impone esaki, existi uniform di school.

Poco dia pasa no tabata tin problema bao di mata di kwihi dilanti Colegio Arubano?

Si na Colegio Arubano e studiantenan tabata tin uniform, por a saca afo mes ora cual di esnan bao di mata di kwihi ta studiantenan di colegio y cualnan ta esnan cu ta bay causa problema.

Si tin uso di droga manera ta ser bisa, por saca afo tambe mes ora ta kende(nan) ta e usadornan y e bendedornan bao di mata.

Studiantenan cu uniforma, den casanan asina ta evita di haya nan mes envolvi, pasobra e uniform ta reda nan.

Na otro schoolnan, uniform ta pone cu autoridadnan sa mes ora ta di cual school alumnonan ta bay pa stroba les na otro school na momento cu nan ta liber of no tin school.

Cu uniform e alumnonan ta evita e otro schoolnan pa no haya nan involucra den cualquier asunto negativo pa nan y pa nan school.

Juby

Pakico Aruba no ta participando na "Expo '98"

ORANJESTAD (AAN): Gruponan na Aruba ta sumamente preocupa, di con Aruba lo no ta participando

den e ultimo exposicion global di e Siglo aki, esta e asina yama "Expo '98" na Lisboa.

Expo 98 aki lo ta for di 22 di Mei 1998 te cu 30 di September 1998. E pregunta principal ta: Di con Aruba no ta participando den e evento grandi aki?

Otro islanan den Caribe, manera Antigua & Barbuda, Barbados, Dominica, Cuba, Jamaica, Grenada, St. Lucia, St. Kitts & Nevis, St. Vincent, etc. ta participando. Di con Aruba su number no ta aparece.

Sigur ta di vital importancia pa Aruba ta presente na e Expo 98 aki. Esnan cu tin internet por check mas di esaki na www.expo98.pt.

DIARIO ta spera cu lo por tin claridad riba e asunto aki.

Gerencia di CHAMPAGNE

"Hottest Music Bar Entertainment Center"
J. G. Emanstraat 124, Tel: 820048

TA PARTICIPA
CU NO TA PARA RESPONSABEL PA
NINGUN GASTONAN HACI PA
SR. DONALD ROMBLEY
HACI DEN NUMBER DI
CHAMPAGNE

Gerencia

RED SAIL SPORTS

IS INTERVIEWING FOR THE
FOLLOWING POSITIONS:

SCUBA DIVE INSTRUCTOR

We are accepting applications during
the following hours:
From Monday till Friday:
between 9:00 - 11:30am.

At the Red Sail Sports Office between
the Americana and Hyatt Hotel.